

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 9
Mayo 7, 2010
www.philippinerevolution.net

Editorial

Magkaisa at wakasan ang rehimeng US-Arroyo


Ilang araw na lamang bago ang reaksyunaryong eleksyon sa Mayo 10. Umaasa ang maraming Pilipino na kasabay nito ay matatapos na ang termino ng kinamumuhiang rehimeng US-Arroyo.

Sawang-sawa na ang mamamayan sa paghaharing US-Arroyo. Sa mahigit siyam na taon nito sa poder, tuluy-tuloy na dumaos ang kabuhayan, sumirit ang disempleyo at lalong lumaganap ang kahirapan, kagutuman at kaapihan.

Naging sunud-sunuran ang papet na rehimen sa mga dikta ng among imperyalistang US. Binigyang-daan ang permanenteng presensya ng mga tropang Amerikano sa bansa at ang panghihimasok ng US sa lahat ng mahahalagang usapin kabilang na ang eleksyon, para mapanatili ang neokolonyal na paghahari nito sa bansa.

Bunsod ng todo-largang pagsasakatuparan ng imperyalistang patakarang neoliberal, nawasak ang mga produktibong pwersa, lumala ang problema sa lupa at ang pagkaatrasado at pagkalugmok sa krisis ng kabuhayan ng mamamayan. Walang hanggan ang pandarambong at pangungurakot. Labis ang kasalanan ng serbisyo sa kalusugan, edukasyon, pabahay at iba pang batayang pangangailangan ng mamamayan. Lalong naging bangkarote at lubog sa utang ang reaksyunaryong gubyrno.

Hinigitan ng siyam na taong Oplan Bantay Laya ang kalupitan at terorismo ng lahat ng mga nagdaang kontra-mamamayang kampanya ng panunupil ng papet na reaksyunaryong estado. Nilagpasan nito ang 14 na taon ng pasistang diktadurang US-Marcos sa dami ng mga kaso ng ekstrahudisyal na pagpatay at pagdukot ng mga aktibista, paghahasik ng teror sa



Mga tampok sa isyung ito...

**"Oplan RAFAEL,"
gumugulong na**

PAHINA 3

**51 armas, nasamsam
ng BHB sa Negros at
Mindanao**

PAHINA 6

**Imahe ni Ka Bel,
pinasinayaan sa
Maynila**

PAHINA 8

buong bansa, maramihang pwersa-hang pagpapalikas ng mamamayan at iba pang mga paglabag sa karapatang-tao.

Tuluy-tuloy pa rin ang mga manobra ni Gloria Arroyo upang tiyakin sa iba't ibang paraan ang pagpapalawig ng kanyang paghahari. Handa siya at ang kanyang mga kasapakat na bagtasin ang mahabang ruta ng pag-upo sa Kongreso, paghawak ng aktwal na kapangyarihan bilang Speaker at pagtulak ng "Chacha" hanggang mailuklok ang sarili bilang Punong Ministro sa ilalim ng bagong sistemang parlamentaryo. Nakahanda rin siyang udyukin at samantalain ang kaguluhan ng eleksyon (kabilang ang malawakang pagpalya at maraming anomalya sa de-kompyuter na eleksyon) at suungin ang paspasang ruta ng paggamit ng tahasang dahas. Sisikapin din niyang maikuha ng "ligal" na basbas ang mga ito sa pamamagitan ng isang Korte Supremang kontrolado niya.

Ang mga ito'y lalong nagpapasidhi sa pagkamuhi ng mamamayan at pag-igting ng kanilang pagnanais na tuluyan nang wakasan ang paghahari ni Arroyo.

Gayunman, ang atensyon ng

mamamayan ay nalilihis dahil sa ingay ng bulok na reaksyunaryong eleksyon. Ang mababaw na tugon sa mga matagal nang hinaing ng mamamayan, ang mga gimik at ang maigting na bangayan ng mga reaksyunaryong partido at kandidato ay humahatak at humahati sa hanay ng mamamayan at tumatabon sa mas malaki at mas mahalagang laban para hadlangan ang pagpapalawig pa ng naghaharing rehimen at kumprontahin ang mabibigat na mga saligang suliranin ng bayan.

Higit kailanman, dapat himukin ang lahat ng partido at kandidato ng oposisyon na magkaisa kabalikat ng mamamayan oras na ipilit ng naghaharing pangkatin ang mga maniobra para panatilihin sa poder si Gloria Arroyo.

Dapat buuin ang pinakamalawak na pagkakaisa ng lahat ng pwersang anti-Arroyo upang tiyakin ang pagwawakas ng rehimen at ang pagpapanagot sa pangkating Arroyo sa lahat ng krimen nito sa bayan. Dapat maging mapagbantay at puspusang kumilos upang biguin ang lahat ng maiitim na pakana ng naghaharing pangkatin. Dapat aktibong kumilos ang malawak na

mamamayan kasama ang mga pwersang anti-Arroyo para madala sa mapagpasyang wakas ang paghahari ni Arroyo, gaano man katin-di at katagal ang pakikibakang ito.

Sa pagkakaisa at pagsusulong ng laban para wakasan na ang rehimen ng US-Arroyo, dapat higit pang patingkarin ang matagal nang mga hinaing ng mamamayan at mga saligang usaping nararapat tugunan sa ilalim ng anumang kaayusang hahalili sa kinamumuhang rehimen.

Kaalinsabay nito, dapat ding mahigpit na bantayan, ilantad at labanan ang higit na panghihimasok ng imperyalismong US.

Sa mga susunod na araw at linggo, malalagay sa sentro ng pulitika sa bansa at maaaring human-tong sa malaking pagsambulat ang ilang taon nang kumukulong laban para wakasan ang naghaharing rehimen ng US-Arroyo. Anuman ang kalalabasan ng kasalukuyang eleksyon at anuman ang aabutin ng mga maniobra ng pangkating Arroyo, tiyak na mag-iibayo pa ang bangga sa hanay ng mga magkakabibig na paksyon ng mga reaksyunaryo. Ang ibubunga nitong di karaniwang pagtindi ng bangayan sa hanay ng mga reaksyunaryo at malaking kaguluhan sa reaksyunaryong estado ay magsisilbing mainam na pagkakataon na dapat masagpang tungo sa ibayong pagsigabo ng paglaban ng mamamayan at malaking pag-igpaw ng rebolusyonaryong kilusan.

Dapat puspusang paghandaan at samantalain ng mga rebolusyonaryong pwersa at ng mamamayan ang hinaharap nating pambihirang pagkakataon para sa ibayo pang pagsusulong, di na lamang ng pagpapabagsak sa rehimen ng US-Arroyo, kundi ng tuluy-tuloy na pakikibaka hanggang sa mabigyang-wakas ang buong bulok na papet at reaksyunaryong naghaharing estado at sistema.

AB



Taon XLI Blg. 9 Mayo 7, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial

- Magkaisa at wakasan ang rehimen ng Arroyo 1
- "Oplan RAFAEL," gumugulong na 3
- People power kapag pumalya ang eleksyon 4

Pananalanta ng pasistang estado

- Morong 43, inilipat sa Camp Bagong Diwa 5
- Areglo sa mga Marcos, tinututulan 5
- Maguindanao masaker, ihahapag sa UN 5

Matatagumpay na TO

- 24 na armas, nasamsam sa Negros 6
- 27 armas, nasamsam sa Mindanao 6
- Mga ambus sa iba't ibang rehiyon 7
- Kumpanya ng mina, kaaway ng bayan 8
- Araw ng Pagggawa, ginunita 8
- Imahe ni Ka Bel, pinasinayaan 8

- Balita 9

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

"Oplan RAFAEL," gumugulong na

Ibinunyag ng partidong Bayan Muna (BM) nitong Mayo 5 ang tinagurian nitong "Oplan Retain Arroyo through Failure of Elections (Oplan RAFAEL)," ang pangkalahatang plano ng pangkating Arroyo para makapanatili sa poder. Ayon kay Rep. Teddy Casiño ng BM, kung pagdudugtung-dugtungin ang mga nangyayari ngayon, makikita na buo at ipinatutupad na ang mga sangkap ng Oplan RAFAEL.

Ang pagbubunyag na ito ay kasunod ng mga kaguluhang ibinunsod ng pagpalya ng mga Precinct Count Optical Scan (PCOS) *machine* nang subukan ang mga ito sa limang syudad at apat na prubinsya sa Luzon noong Mayo 3. Ang PCOS *machine* ay ang kompyuter na magbibilang ng mga boto.

Nalantad noong Mayo 3 ang mga depekto sa mga *flash card* na naglalaman ng datos na pagbabasehan ng kompyuter sa pagbibilang ng boto. Sa ilang pagsubok na pagboto para sa halalang pampresidente, anuman ang markahan sa sampol na balota ay puro ang pangalan ng manok ng Malacañang na si Gilbert Teodoro ang binibilang ng makina. Mas marami pa ang katulad na pangyayari sa pagbibilang ng mga boto sa antas-lokal.

Ayon sa Commission on Elections (COMELEC) at ng Smartmatic-TIM, nagkaroon lamang ng problema sa pagbabasa ng mga *flash card* sa mga boto dahil sa nabagong disenyo ng mga balota. Sinabi nilang mapapalitan naman nila ang mga depektibong *flash card* hanggang Mayo 7 o tatlong araw bago ang mismong araw ng eleksyon. Dati nang inabot nang dalawang buwan ang paghahanda sa mga *flash card*, kaya marami ang nagdududa na mapapalitan ang 76,000 depektibong *flash card* para sa lahat ng mga presinto bago ang Mayo 10. Inamin nilang sa malalayong lugar ay maaaring sa mismong araw pa ng eleksyon o maaaring makaraan pa iyon mapapalitan ang mga *flash card*. Maging ang mga PCOS *ma-*

chine ay maaaring mahuli rin ang dating sa mga lugar na iyon. Itatabi na lamang daw muna ang mga napunuang balota at saka na lamang ipapasok sa mga PCOS *machine* kapag nakarating na ang mga ito at ang bagong mga *flash card*. Lalo't sa parehong mga lugar na ito, kabilang ang maraming lugar sa Moro Mindanao, karaniwang nagaganap ang malawakang pandaraya sa eleksyon, pinangangambarang mapapakialaman ang mga maitatabing napunuan na ngunit di pa nabilang na mga balota bago maipasok sa mga PCOS *machine*.

Sa ilang presinto sa Metro Manila kung saan naihatid at nasubukan na ang mga bagong *flash card*, ibinalita ng COMELEC na nagtutugma na ang bilang sa boto. Ngunit malawak pa rin ang pagdududa na sa maraming lugar, ang ipapalit na mga *flash card* ay maglalaman pa rin ng elektronikong pandaraya, bagamat mas pulido na ito para di maging masyadong kaduda-duda ang labas. Sa kabila ng paulit-ulit na kahilingan, hindi pa ibinubukas sa pagsusuri ng mga eksperto ang *source code* o mga instruksiyong bumubuo sa programang magpapatakbo sa mga


PCOS *machine* upang matiyak na wala itong depekto.

Sa kabila ng desisyon ng COMELEC na itutuloy pa rin ang eleksyon sa Mayo 10 at gagawa na lamang daw sila ng plano kung ano ang gagawin sakaling magkaroon pa rin ng malaking aberya sa mismong araw ng eleksyon, hindi pa rin isinasaisantabi ni Arroyo ang posibilidad na hindi matuloy ang eleksyon. Tuluy-tuloy ngayong pinagpupulungan ito nina Arroyo at kanyang mga kasapakat sa Malacañang at pinaghahanda nila ang mga pwersang militar sakaling magkaroon nga ng malaking aberya sa dekompyuter na bilangan ng boto.

Halos nakakasa na ang lima sa walong mga kundisyon ng pagpalya ng eleksyon para makapanatili si Arroyo lampas sa kanyang termino, ani Casiño.

Bukod sa mga problemang kinakaharap ng dekompyuter na pagbibilang ng boto at kaugnay na panukalang pagsuspindi ng halalan, ang iba pang elemento

ay ang 1) kawalan ng nakaupong Senate President na siyang pansamantalang mamahala sa bansa sakaling wala muna nang maipoproklamang presidente at bise presidente; 2) paghirang ni Arroyo ng bagong punong mahistrado ng Korte Suprema sa kabila ng pagbaba-



wal ng saligang batas na maghirang nito dalawang buwan bago ang eleksyon hanggang sa pagtatapos ng kanyang termino; 3) paghirang sa mga namumunong pusisyon sa Armed Forces of the Philippines ng mga heneral na pinakamatapat kay Arroyo, pati na ang mga sangkot sa pandaraya sa eleksyon ng 2004; at 4) pagbibigay ng masaklaw na papel sa militar sa prosesong elektoral.

Kulang na lamang ang mismong pagsambulat ng kaguluhan at ang bibigyang-daan nitong patuloy na pag-angkin ni Arroyo ng kapangyarihan bilang "pangulong pantransisyon."

Samantala, nagpapakat na ng mahigit 2,300 sundalo ng AFP sa sampung syudad ng Metro Manila na

itinuturing na mga *election hotspot* (maaaring maging magulo sa eleksyon). May dagdag ding 1,800 sundalo at pulis sa lima sa mga syudad na ito kung saan pinakamalamang na sisiklab umano ang kaguluhan. Ang libu-libong sundalong itinambak sa pambansang kabisera ay labas pa sa tatlong batalyon ng militar na nakatalaga sa National Capital Regional Command ng AFP.

Bunsod ng mga ito, nanawagan si Rep. Satur Ocampo ng Bayan Muna na itigil na muna ang pagbabatuhan ng putik ng mga magkalabang kandidato para magkaisa at biguin ang Oplan RAFAEL. Aniya, mapipigilan lamang ang imbing pakanang ito ng nagkaisang mamamayan. AB

People power, kailangan kapag pumalya ang eleksyon

Kinakailangan ang *people power* kapag pumalya ang *automated elections* sa darating na Mayo. Ito ang tugon ng mga progresibong grupo sa loob ng Simbahang Katoliko sakaling mangyari ang malawakang dayaan sa eleksyon at walang maiproklamang pangulo, pangalawang pangulo at mga senador.

Nilinaw ng mga grupo ang kaalalahan ng sama-samang pagkilos ng mamamayan sa harap ng komentaryo ni Gaudencio Cardinal Rosales, arsobispo ng Maynila, na isang iresponsableng hakbang ang pagpanawagan ng isang kandidato o grupo ng People Power dahil sa dayaan sa eleksyon.

Dapat lumaban ang mamamayan kapag nagkaroon ng dayaan at ang irerresultang kabiguan ng eleksyon ay magbubunsod ng patuloy na pag-upo sa poder ni Gloria Arroyo bilang pangulong pantransisyon, ani Fr. Jose Dizon ng Solidarity Philippines at isa sa mga *convenor* ng Kontra Daya. Ang Kontra Daya ay isang koalisyon ng mga organisasyon at indibidwal na nagtataguyod ng malinis at kapani-paniwalang eleksyon.

Kung ang paglaban nila ay nangangailangan ng sama-samang pagkilos para biguin ang imbing pakanang ito, karapatan iyon ng mamamayan. Nakasalalay ang kani-

lang makapangyarihang lakas sa sama-samang pagkilos, paliwanag ni Fr. Dizon.

Gayunman, ang sama-samang mga pagkilos na ito ay hindi para lamang sa iisang grupo o partido kundi para sa interes ng mamamayang Pilipino, dagdag pa niya.

Ayon naman kay Sr. Mary John Mananzan, pangulo ng Association of Major Religious Superiors in the Philippines (AMRSP) at isa rin sa mga *convenor* ng Kontra Daya, ang pagpunta sa mga lansangan ang siyang natitirang hakbang ng mamamayan.

Aniya, walang tiwala ang ma-

mamayan sa Kongreso, sa Korte Suprema at sa halos lahat ng mga ahensya ng gubyernong Arroyo.

Mas malaking kasalanan para sa Simbahang Katoliko kung hindi ito kikilos sa ganoong kalagayan, sabi ni Sr. Mananzan. Hindi dapat manood na lamang ang Simbahan at hayaang yurakan ang mga karapatan ng mamamayan.

Kinatigan din ni Archbishop Emeritus Oscar Cruz ang mga pananaw ng dalawang lider-relihiyoso. Kasabay nito, nagpahayag siya ng

kahandaang sumama sa mga kilusang masa kung ang kalalabasan ng darating na eleksyon ay taliwas sa tunay na kapasyahan ng mamamayan at kaduda-duda ang proseso ng halalan.

Mali ang mag-sawalang-kibo kung may mga katiwalian, sabi ni

Archbishop Cruz. Dapat itaguyod ng isang pari ang pagiral ng katotohanan at katarungan. Dapat palaganapin ng mga pari ang katarungan at kapayapaan sa lipunan, dagdag pa niya. AB



38 sa Morong 43, inilipat sa Camp Bagong Diwa

Sa wakas ay napwersa rin ang Philippine Army na sundin ang utos ng Skorte na ilipat sa piitang sibilyan ang mga manggagawang pangkalusugan na dinakip ng mga sundalo sa Morong, Rizal noong Pebrero. Inilipat na sa Camp Bagong Diwa sa Taguig City noong Mayo 1 ang 38 sa tinaguriang Morong 43 mula sa Camp Capinpin, hedkwarters ng 2nd ID, sa Tanay, Rizal.

Matatandaang noong Abril 7 pa iniutos ng hukuman ang paglilipat sa mga detenido sa kustodiya ng pulisya. Naunsyami ang paglilipat sana sa Camp Crame sa Quezon City noong Abril 12 nang tanggihan ng pulisya ang mga detenido sa katwirang siksikan na umano sa piitan ng kampo.

Lima sa mga detenido ay patuloy na hinahawakan ng Philippine Army matapos umano silang umano na mga myembro ng Bagong Hukbong Bayan. Pinaniniwalaang ang gayong pag-amin ay ginawa ng mga detenido dahil sa matinding pagpapahirap sa kanila ng mga sundalo. **AB**

Areglo sa mga Marcos, tinututulan

Tinututulan ng mga biktima ng paglabag sa karapatang-tao noong panahon ng diktadurang Marcos ang panibagong tangka ng rehimeng Arroyo na makipag-areglo sa pamilya ng diktador kaugnay ng mga nakaw nilang yaman.

Ang naturang balakin ng rehimen ay siya nang pinakamalaki sa mga lihim na pakikipag-areglo na pinapasok ng gubyernong Arroyo sa mga nalalabing araw ng termino nito. Inihayag ni Commissioner Ricardo Abcede ng Presidential Commission on Good Government (PCGG) noong Abril 30 na may nagaganap na pakikipag-aregluhan sa mga Marcos. Nakipag-usap daw siya kay Gregorio Araneta, manugang ng yumaong diktador, ukol sa pagbawi ng gubyerno sa P140 bilyong nakaw na yamang nahaharap pa sa 520 kasong sibil. Gayunman, ayaw ihayag ni Abcede ang mga detalye ng kanilang naging pag-uusap.

Ayon kay Atty. Romeo Capulong, abugado ng mga biktima, tila minamadali ng gubyernong Arroyo ang iskandalosong aregluhan. Idinagdag pa ni Capulong na dapat ituloy ng gubyerno ang paghahabol sa pamilyang Marcos dahil naipapanalo naman ang mga kaso.

Matatandaang naipagwagi ng 10,000 biktima ng diktadura ang isinampa nilang *class suit* laban sa mga Marcos sa isang hukuman sa US noong 1995. Gayunman, hanggang ngayon ay hindi pa nakuha ng mga biktima ang \$2.7 bilyong bayad-pinsala na naipanalito nila.

Ani Capulong, hahadlangan ng 10,000 biktima ang anumang pakikipag-areglo sa mga Marcos oras na maihapag iyon sa Sandiganbayan. **AB**

Kaso ng Maguindanao masaker, isasampa sa UN

Binalaan ng Reporters Sans Frontieres (RSF) ang gubyernong Arroyo na isasampa nila sa United Nations Human Rights Council (UNHRC) ang kaso ng masaker sa Maguindanao kung hindi niyon mapananagot ang mga salarin dito.

Ipinahayag ito ng pandaigdigang organisasyon ng midya sa kanilang bukas na liham kay Arroyo noong huling linggo ng Abril bundod ng naunang pagpapawalang-sala ni Justice Secretary Alberto Agra sa dalawang myembro ng angkang Ampatuan. Nilagdaan ang bukas na liham ni Jean-Francois Juliard, pangkalahatang kalihim ng RSF.

Ang angkang Ampatuan ang siyang itinuturo na may kagagawan sa karumal-dumal na pagmasaker sa 57 katao, kabilang ang 32 mamamahayag noong Nobyembre 23, 2009. Noong Abril 16, inalis ni Secretary Agra sina Gov. Zaldy Ampatuan ng ARMM at Mayor Akmad Ampatuan ng Mamasapano, Maguindanao sa listahan ng mga akusado. Naobligang na lamang ang Malacañang na ipabawi kay Agra ang desisyon matapos itong magbundod ng matinding pagbatikos at mga kilos-protesta ng mga tagamidya, mga pamilya ng mga biktima, mga tagasuporta nila at pati na ng mga abugado ng gubyerno.

Sinabi ng RSF na kung tutulugan lamang ng gubyernong Arroyo ang masaker sa Maguindanao para maabswelto ang isa sa kanyang mga pangunahing alyado, idudulog nito ang kaso sa UNHRC. **AB**



24 na armas, nasamsam ng BHB sa Negros

Dalawampu't apat (24) na armas ang nasamsam sa dalawang magkahiwalay na operasyong disarmo na isinagawa ng Bagong Hukbong Bayan (BHB) sa Negros bago matapos ang buwan ng Abril.

Noong takipsilim ng Abril 30, nireyd ng mga Pulang mandirigma sa ilalim ng Roger Mahinay Command (RMC-BHB) ang Maricalum Mining Company sa Barangay San Jose, Sipalay City, Negros Occidental. Nasamsam ang 20 armas mula sa mga armadong bantay nito at sa dalawang nagrespondeng pulis mula sa Sipalay PNP Substation.

Ang mga nasamsam ay kinabibilangan ng 12 Mossberg *shotgun*, dalawang kalibre .38 rebolber, dalawang pistolang 9 mm, dalawang kalibre .22 na rebolber, isang M16, isang M14, isang granada, maraming bala at iba pang gamit militar. Ilang oras na hinawakan ng BHB ang pinuno ng mga gwardya ng Maricalum Mining Company.

Ang kumpanyang ito ay dating kilala bilang Marinduque Mining

and Industrial Corporation at ngayon ay pinangangasiwaan ng G Holdings Inc. Binigyang-babala na ito ng BHB nang salakayin ang garahe ng eroplano nito mahigit isang buwan na ang nakararaan.

Ayon kay Ka Nilo Magtanggol, tagapagsalita ng RMC-BHB, muli nilang sinalakay ang kumpanya dahil binalewala nito ang matagal nang mga babala sa kanila na tigilan na ang pamamaril sa mga kumukuha ng mga iskrup na bakal sa loob ng *compound* ng kumpanya. Mahigit 100 katao na ang pinaslang ng mga gwardya ng minahan nitong nagdaang mga taon.

Bago ito, dinisarmahan ng mga mandirigma ng Roselyn "Ka Jean" Pelle Command (RPC) ang isang elemento ng bandidong Revolutionary Proletarian Army (RPA) at

dalawang gwardya ng isang malaking panginoong maylupa sa isang bahay sa Sityo Minauyahan, Barangay Mina-utok, Calatrava, Negros Occidental noong Abril 27. Nasamsam ang isang ripleng M16 na may siyam na magasin, isang KG9 *machine pistol* at dalawang *shotgun*.

Ang bahay ay pag-aari ng pamilyang Lumayno. Ang administrador ng bukirin ito ay si Raul Baterna, isang malupit na sarhento ng nabuwag na Philippine Constabulary (PC). Ang mga magsasaka at manggagawang bukid sa naturang lupain ay nagreklamo ng pananakot at pananakit sa kamay ng mga armadong tauhan ni Lumayno.

Ayon sa RPC, may atas ang Hukumbang Bayan sa BHB na arestuhin sina Bebe Lumayno at Baterna dahil sa mga kaso tulad ng pangangamkam ng lupa at paggamit ng mga pribadong *goons* kabilang na ang RPA. AB

27 armas, nasamsam ng BHB sa Mindanao


Hindi bababa sa 27 armas na may iba't ibang kalibre ang naani ng Bagong Hukbong Bayan (BHB) sa mga operasyong pag-aresto at pagdisarma sa mga pulitiko at kanilang mga armadong badigard habang ipinatutupad ng mga Pulang mandirigma ang mga patakaran sa eleksyon at iba pang mga atas ng rebolusyonaryong guberno.

Mayo 5. Inaresto ng mga Pulang mandirigma ng Conrado Heredia Command na nasa ilalim ng Merardo Arce Operational Command-BHB sa Southern Mindanao si Mayor Roberto Luna Jr. ng Lingig, Surigao del Sur sa isang makilos na tsekpoynt na itinayo sa Davao-Agusan National Highway, Barangay Pasian, Monkayo, Compostela Valley. Kasama niyang nabihag ang apat na badigard niya na sina PFC John Rey Abao at PFC Arnel Dizon (kapwa nakatalaga sa 58th IB) at

mga pulis na sina P02 Boy de Castro at P03 Alan Dapitanon.

Nakumpiska sa kanila ang limang M16, dalawang pistolang kalibre .45, isang pistolang 9 mm at isang pistolang kalibre .380.

Nasa huling termino na bilang alkalde ng Lingig si Luna at tumatakbo ngayon bilang bise alkalde. Dinakip siya para maimbestigahan sa mga kasong kri-



minal at katiwalian na naisampa sa Hukumbang Bayan laban sa kanya. Ilan sa mga ito ang kasong pagpatay sa magkapatid na Suazo sa Barangay Union, Lingig (2007); kasong pagpatay kay dating alkalde Amerosin V. Onsing (2001); at pangangamkam ng 30 ektaryang lupain sa mga barangay ng Pagbacatan at Dahican, Lingig. May nakasalang ding mga kaso sa reaksyunaryong korte si Luna tulad ng ilegal na pagtotroso, pagpalsipika ng mga upisyal na dokumento, kurapsyon at katiwalian hinggil sa P26 milyon na inutang sa



bangko para sa irigasyon noong 2009.

Abril 28. Hinarang at dinisarmahan ng mga Pulang mandirigma ng Front 30 ang komboy ng reeleksyunistang si Rep. Philip Pichay at kandidato sa pagkaalkaldeng si Henrich Pimentel nang dumaan ito sa Sityo Cadlum, Barangay Cabangahan, bayan ng Tago, Surigao del Sur. Bukod sa kanilang pribadong hukbo, may eskort din silang mga tauhan ng PNP Regional Mobile Group.

Ayon kay Ka Maria Malaya, tagapagsalita ng NDF-NEMR, nilabag ng grupo nina Pichay at Pimentel ang patakaran laban sa pagdadala ng armas sa panahon ng pangangampanya sa eleksyon. Nakumpiska sa komboy ang apat na ripleng AK-47, tatlong ripleng M16, isang pistolang kalibre .45, isang pistolang kalibre .40 at dalawang pistolang 9 mm.

Abril 24-26. Dinisarmahan din si Mayor Candelario Viola sa bayan ng Hinatuan, Surigao del Sur at ang mga gwardya ng reeleksyunistang alkalde ng Bislig City na si Alberto Tan. Nangyari ito sa Road 13 nang patungo sila sa Sityo Mamparasan, San Roque, Bislig City.

Abril 22. Sinita at dinisarmahan ang grupo ni Mayor Donnel Polizon at apat na myembro ng Sangguniang Bayan sa Barangay Sta. Juana, Tagbina, Surigao del Sur.

Abril 20. Nakumpiska sa mga *goons* ni Mayor Thelma Lamanilao sa Sibagat, Agusan del Sur ang dalawang kalibre .45 pistola, dalawang kalibre .38, isang 9 mm at isang KG9 *machine pistol*.

Abril 15. Dinisarmahan ng BHB si Mayor Alexander Pimentel ng Tandag City at Carlos Egay Sr. ng Gigaquit, Surigao del Norte. Nasamsam sa kanila ang isang KG9 *machine pistol* at isang kalibre .45 pistola. AB

12 sundalo patay, 5 sugatan sa ambus sa Antipolo

Muling tinambangan ng Bagong Hukbong Bayan (BHB) ang pinagsanib na pwersa ng PNP Special Action Force (SAF) at 16th IB noong hapon ng Abril 22 sa Masalo, Sityo Tayabasan, Barangay San Jose, Antipolo City.

Naganap ang ambus habang nagsasagawa ng operasyong pagtugis ang mga pwersa ng pulis at militar laban sa BHB bunsod ng pananambang nito sa SAF noong Abril 20 sa nasabi ring lunsod.

Ngunnit lingid sa kaalaman nila, naglatag ng *area ambush* ang mga Pulang mandirigma sa posibleng dadaanan ng kaaway. Bandang alas-3:00 ng hapon nagsimula ang labanan. Pagkatapos ng isang oras, 12 sundalo ang napatay at limang iba pa ang nasugatan, ani Macario "Ka Karyo" Liwanag, tagapagsalita ng Narciso Antazo Aramil Command (NAAC)-BHB-Rizal.

Samantala, walang kaswalti sa panig ng mga Pulang mandirigma at ligtas silang nakabalik sa kanilang kampo.

Para ilingid sa mamamayan at sa mga mamamahayag ang natamang kaswalti ng mga pulis at militar, itinaon sa gabi ang pagsundo ng dalawang helikopter sa mga patay at sugatan. Nagpataw ng *news blackout* ang pamunuan ng AFP-PNP tungkol sa nangyaring ambus para hindi maisapubliko ang kanilang sunud-sunod na pagkatalo sa BHB.

Isang sundalo patay, 2 sugatan sa ambus sa Masbate

Isa ang napatay at tatlong iba pang tropa ng 85th IB ang nasugatan nang ambusin sila ng mga gerilya ng Jose Rapsing Command ng BHB sa Barangay Gaid, Dimasalang, Masbate noong Mayo 3.

Lulan ng isang trak ang mga sundalong pinamumunuan ni Col. Lope Dagoy nang pasabugan sila ng BHB ng *command-detonated explosive*, ayon kay Ka Greg Bañares, tagapagsalita ng NDF-Bicol.

Ani Bañares, sagot ito ng BHB sa hamon ni Dagoy na nagtatarago sa likod ng titulong UN Peacekeeping Force. Dating kumander din si Dagoy ng 19th IB at tagapagpatupad ng Oplan Bantay Laya sa Leyte noong 2005-2007.

Elemento ng CAFGU, patay sa ambus sa Davao del Sur

Sa Davao del Sur, dalawang elemento ng CAFGU ang napatay at isa pa ang nasugatan nang ambusin ng BHB ang isang trak ng militar noong umaga ng Abril 25 sa Barangay Patulangon, bayan ng Sta. Cruz. Ang mga kaswalti ay nasa ilalim ng 39th IB ng 10th ID.

Nasamsam ng pinalaking iskward ng BHB, na nasa ilalim ng Magtanggol Roque Command Front 51, ang isang ripleng M14. Walang kaswalti sa panig ng BHB.

Ayon kay Ka Simon Santiago, pampulitikang direktor ng Regional Political Department ng BHB sa Southern Mindanao, sampal ito sa 39th IB at 10th ID na nagdeklara kamakailan na napalayas na nila ang BHB sa bayan ng Sta. Cruz.

Kumpanya ng mina, kaaway ng mamamayan

Idineklara ng mamamayan ng Far South Mindanao na kaaway nila ang isang malaking dayuhang kumpanya ng minahan dahil sa patuloy na pandarambong nito sa likas na yaman at pagbubunsod ng malawakang pagkawasak sa kalikasan sa timog-sentral Mindanao.

Kaugnay nito, inatasan ng pan-rehiyong Hukumang Bayan noong Abril 22 ang mga yunit ng Bagong Hukbong Bayan na arestuhin ang matataas na upisyal ng Xstrata at ng lokal na kasosyo nito, ang Saggittarius Mines Inc. (SMI), para panagutin sa kanilang mga krimen sa mamamayan.

Ayon sa National Democratic Front sa rehiyon, nakabatay ang mandamyento de aresto sa masu-

sing pagtitimbang ng mga ebidensya at sa mga saligang prinsipyo ng rebolusyonaryong hustisya.

Bagamat nasa antas pa lamang ng eksplorasyon ang naturang minahan, nasisira na nito ang mga kabundukan at mga *watershed*. Bunga nito, napipilitang lumikas ang mga pambansang minorya at maghanap na lamang ng kabuhayan sa ibang lugar. Sa kasalukuyan, apektado ng operasyon ng minahan ang

mga pangunahing ilog ng South Cotabato, Davao del Sur, Sultan Kudarat at Sarangani.

Kabilang sa mga apektado ang *watershed* ng Koronadal Valley sa South Cotabato na tinaguriang bigasan ng Mindanao.

May mga ulat na gumagawa ang Xstrata ng *tailings pond* o saluhan ng basura ng mina sa *watershed* na malapit sa Mal River sa Davao del Sur. Pinangangambahang malalason at masisira nito ang dalawang pambansa at lokal na sistemang irigasyong komunal at ang kabuhayan ng 9,000 magsasaka. **AB**

Araw ng Pagggawa, ginunita sa buong bansa

Humugos sa lansangan sa iba't ibang panig ng bansa ang mga manggagawa, maralitang-lunsod at kanilang mga tagasuporta para ipagdiwang ang Pandaigdigang Araw ng mga Manggagawa nitong Mayo 1.

Imahe ni Ka Bel, pinasinayaan sa Plaza Miranda

Tampok sa pagdiriwang ng Araw ng Paggawa ang pagpapasinaya sa imahe ni Crispin "Ka Bel" Beltran, bantog na lider-manggagawa, dating tagapangulo ng Kilusang Mayo Uno at kinatawan ng partidong Anakpawis na namatay noong 2008.

Ang imaheng gawa ng iskultor na si Julie Lluch ay ikinabit sa isang haligi sa Plaza Miranda sa Maynila.

Nagsisilbi iyong simbolo ng pagkilala sa kanya bilang bayani ng kilusang manggagawa sa bansa. Ilang dekadang naging malaking bahagi si Ka Bel ng mga pagdiriwang ng Mayo Uno. Sa Plaza Miranda, hindi mabilang ang pagkakataong nagtalumpati si Ka Bel para sa mga karapatan at kagalingan ng uring manggagawa.

Ang isinagawang pagkilala kay Ka Bel ay inisyatiba ng guberno ng syudad ng Maynila. Ang pagpapasinaya sa imahe ni Ka Bel ay ginanap noong umaga ng Mayo 1. Dinaluhan ito ng mga kasapi ng mga progresibong organisasyon, pati na ng mga oposisyunistang pulitiko mula sa iba't ibang partido. Kabilang sa mga dumalo sina Rep. Satur Ocampo ng Bayan Muna at Rep. Liza Maza ng Gabriela, na kapwa kandidato sa pagkasenador; Alfredo Lim, meyor ng Maynila; at Sen. Francis "Chiz" Escudero.

Si Ka Bel ay namatay noong Mayo 20, 2008 sa edad na 75 matapos mahulog habang inaayos ang bubong ng kanilang tahanan. Nasa ikatlong termino siya noon bilang kongresista. **AB**

Tampok sa mga rali sa buong bansa ang pagtatasa ng mga manggagawa sa siyam na taong administrasyon ni Gloria Arroyo. Tinukoy nila ang napakataas na bilang ng mga walang hanapbuhay, nakapangkong sahod, paglabag sa mga karapatan ng mga manggagawa, pangigingibang-bansa ng pwersa sa paggawa at masamang kundisyon sa mga pagawaan. Binatikos nila ang anti-manggagawang mga batas sa kontraktwalisasyon at *flexible labor policy*, pati na rin ang pagpapataw ng *expanded value-added tax*.

Tulad ng nakagawian ni Gloria Arroyo sa bawat Mayo 1, walang umento sa sahod ang mga manggagawa. Bukod dito, pambabastos sa kahalagahan ng Araw ng Paggawa ang ginawa ni Arroyo sa paglilipat sa petsa ng pagdiriwang ngayong taon sa Mayo 3 mula Mayo 1.

Tampok na bahagi ng pagdiriwang sa araw na ito ang pagpapasinaya sa imahe ni Crispin "Ka Bel" Beltran sa Plaza Miranda sa Maynila (*tingnan ang kaugnay na artikulo*).

Umabot sa 20,000 katao ang

sumama sa pagtitipon sa Liwasang Bonifacio sa Maynila kung saan sinunog ang *effigy* ni Gloria Arroyo na nakapiit at nakadamit-bilanggo. Ang *effigy* na tinawag na “Kulungan ni Gloria” ay simbolo ng sigaw ng mga manggagawa na pagbayarin si Arroyo sa paghihirap na idinulot niya sa mga manggagawa sa ilalim ng kanyang panunungkulan.

Nagtipon noong umaga ang iba pang mga raliyista sa kanto ng Blumentritt at Sta. Cruz, sa kanto ng Quirino at Taft Avenue at sa Plaza Moriones sa Tondo. Kinahapunan, nagmartsa sila patungong Liwasang Bonifacio kung saan nagdaos sila ng programa. Hawak ang mga sulo, nagmartsa ang mga raliyista patungong Mendiola pag-sapit ng alas-6 ng gabi.

Hindi naman kukulangin sa 8,000 ang nagrali sa pamumuno ng Kilusang Mayo Uno (KMU) at Pamantik sa mga prubinsya ng Cavite, Laguna, Batangas at Rizal.

Mga pangkulturang pagtatanghal at martsa naman ang tampok sa selebrasyon ng Araw ng Manggagawa sa mga lunsod ng Legazpi, Naga at Masbate sa rehiyong Bicol. Sa Bacolod City, nanawagan ang mga manggagawa na dagdagan ang kanilang sahod at buwagin ang *regional wage board*. Patuloy namang iginigiit ng mga kasapi ng KMU sa Iloilo City ang P125 *across the board* na pagtaas ng kanilang sahod sa raling dinaluhan ng 3,000 kasapi ng Bagong Alyansang Makabayan at iba pang progresibong grupo mula sa iba’t ibang dako ng Panay.

Samantala ang martsa-rali ng mga manggagawa sa Davao City ay naging miting de abanse ng koalisyong Makabayan kung saan inendorso nila ang kandidatura nina Rep. Satur Ocampo ng Bayan Muna at Rep. Liza Maza ng Gabriela Women's Party. Umabot sa 10,000 ang lumahok dito. AB

Paggamit ng BHB ng pasabog, muling nilinaw ng NDF

MULING nilinaw ng National Democratic Front of the Philippines (NDF) noong Abril 25 na walang nilabag ang Bagong Hukbong Bayan (BHB) sa mga alituntunin sa digmaan sa pagtambang nito sa siyam-kataong yunit ng PNP Special Action Force sa Antipolo City, Rizal noong Abril 20 kung saan limang elemento ng SAF ang napatay at apat ang nasugatan.

Inilina ni Ka Fidel Agcaoili, tagapangulo ng Human Rights Monitoring Committee ng NDFP, na ang paggamit ng BHB ng pasabog ay umaalinsunod sa internasyunal na makataong batas. Ginawa ng NDFP ang gayong paglilinaw bundod ng mga ulat na ipinahayag ni Leila de Lima, tagapangulo ng Commission on Human Rights, na ang paggamit ng BHB ng pasabog “ay paglabag kapwa sa batas sa karapatang tao at internasyunal na makataong batas.”

Kung totoo man ang komentaryo ng tagapangulo ng CHR, di

sinasadyang naulit lamang niya “ang mali at walang batayang akusasyon ng Armed Forces of the Philippines (AFP) at ng Philippine National Police (PNP) laban sa BHB hinggil sa paggamit ng pasabog,” ani Agcaoili. “Tahasang ignorante ang AFP at PNP sa katotohanan at kaukulang internasyunal na batas hinggil sa mina,” dagdag pa nito.

Bagamat hindi ito nakapirma sa Ottawa Treaty o anumang dokumento hinggil sa mga *land mine*, paulit-ulit na nagdedeklara ang BHB at ang NDFP na hindi kailanman gumagamit ang BHB ng bombang hindi *command-detonated* at nakatuon sa mga behikulong militar at tauhan. “Hindi ipinagbabawal ng anumang internasyunal na tratado o kumbensyon ang mga *command-detonated* na mina, kabilang ang Geneva Conventions at mga Protocol nito. Nakadirekta ang mga bombang ito pawang sa mga target militar,” ani Agcaoili.

Byahe sa CALABARZON, naparalisa ng welga

MATAGUMPAY na naparalisa ng welga ang pampublikong transportasyon sa Cavite, Laguna, Batangas at Quezon nitong Mayo 3. Ang isang araw na welgang pinangunahan ng PISTON (Pinag-isang Samahan ng mga Tsuper at Opreytor Nationwide) ay inilunsad upang igiit sa Shell, Chevron at Petron ang P8.00 rolbak sa presyo ng langis. Nanawagan din ang PISTON na ibasura ang 12% *expanded value-added tax* sa mga produktong langis at kagyat na isauli ang P46 milyong siningil sa mga drayber para sa Radio Frequency Identification.

Nagsimula ang tigil-pasada

alas-6:00 ng umaga. Bago magtanghali ay 90% nang paralisado ang rutang San Pedro-Biñan City; Sta. Rosa City-Cabuyao-Calamba City; at mga ruta sa Pagsanjan, Cavinti, Luisiana, Kalayaan, Pakil, Pangil at Siniloan sa Laguna.

Naparalisa rin ng 90% ang transportasyon sa Calamba City, Laguna patungong Carmona, Cavite at Tagaytay patungong mga erya ng Silang; 80% paralisado sa mga syudad ng Calamba patungong Tanauan, Batangas at Tanauan patungong San Pablo sa Laguna; at 50% paralisado sa mga kalsada ng Quezon patungong Lucena City.

Pangkalahatang welga, inilunsad sa Nepal

PARALISADO ang buong syudad ng Kathmandu (kabisera ng Nepal) bunsod ng walang taning na pangkalahatang welga na inilunsad ng 125,000 mamamayang Nepalese noong Mayo 2. Nagsara ang lahat ng negosyo, pagawaan, eskwelahan at upisina. Walang kahit isang sasakyan sa mga lansangan.

Pinamunuan ang pangkalahatang welga ng Communist Party of Nepal-Maoist (CPN-M), pinakamalaking partidong oposisyon sa loob ng parlamento. Iginiit nito ang pagpapataksik kay Prime Minister Madhav Kumar Nepal at sa kanyang gubyrno dahil sa kabiguan nitong konsolidahin ang prosesong pangkapayapaan at buuin ang bagong konstitusyon.

Bago ito, naglunsad din ang mga nagpuprotesta ng malawak na rali noong Mayo 1 sa syudad ng Kathmandu at iginiit ang pagkakaroon ng bagong gubyrno na nakabatay sa pambansang pagkakaisa. Ani Narayan Kaji Shrestha, isang lider ng CPN-M, "Dapat bigyan kami ng pagkakataon na mamuno dahil ang aming Partido ang pinakamalaki sa loob ng *constituent assembly* (kapulungang tagabuo ng konstitusyon)."

Ang CPN-M ang namuno sa gubyrnong koalisyon nang manalo ito sa eleksyon para sa espesyal na *constituent assembly* noong 2008. Ang *constituent assembly* ang itinalagang maghahanda para sa pagbubuo ng bagong konstitusyon batay sa isinasaad sa Comprehensive Peace Agreement noong 2006. Nagdesisyon itong kumalas sa *constituent assembly* matapos tanggihan ng tumatayong presidente na patalsikin ang hepe ng Nepalese Army dahil sa di nito pagtupad sa napagkasunduang integrasyon ng tinatayang 20,000 Pulang mandirigmang Nepali sa hukbo ng estado.

Pagsalakay ng mga gerilyang Kurdish sa Turkey

SINALAKAY ng mga gerilyang Kurdish ang isang detatsment-militar ng gubyrnong Turkey malapit sa Nazimiye sa silangang bahagi ng bansa bago maghatinggabi noong Abril 30. Ayon sa inisyal na ulat, apat na sundalo ang napatay at maraming iba pa ang nasugatan. Tumagal ang labanan hanggang madaling araw. Gumamit ang mga gerilya ng mga *rocket-propelled grenade* at mga riple.

Mula noong Disyembre ay patuloy nang umiigting ang mga la-

banan sa pagitan ng mga pwersa ng gubyrnong Turkey at mga gerilyang kaanib ng Kurdistan Workers Party (PKK). Mahigit dalawang dekada nang ipinaglalaban ng mga gerilyang Kurdish ang pagtatayo ng independyenteng republika ng Kurdistan.

Ang republikang nais nilang itatag ay sumasaklaw sa kalakhan ng timog-silangang Turkey, hilagang bahagi ng Iraq, hilagang-kanlurang bahagi ng Iran at hilagang bahagi ng Syria.

Base militar ng US sa Japan, patuloy na tinututulan

UMABOT sa 100,000 mamamayang Hapones ang nagrali noong Abril 25 sa Okinawa, Japan para igiit ang pagpapataksik sa Futenma Base, isang base militar ng US Marines sa pusod ng pinakamataong syudad sa isla.

Ito ang pinakamalaking rali na naganap sa kasaysayan ng paglaban ng mamamayan sa base militar mula pa noong 1972.

Tinututulan ng mga residente ang presensya ng mga tropa, sobrang ingay ng mga eroplano at pagkasira sa kalikasan. Mula 1972, ang mamamayan ng Okinawa ay nakaranas na ng 26,413 krimen at 456 na mga aksidente dahil sa mga tropa ng US. Pinakamatingkad dito ang panggagahasa ng dalawang US Marines at isang elemento ng US Navy sa isang 12 anyos na estudyante noong 1995. Nagbunsod ito ng malaking protesta ng mamamayan at bunga nito ay napilitan ang Japan at US na pansamantalang isara ang Futenma Base.

Noong Agosto 2004, bumagsak ang pandigmang helikopter ng US sa loob ng kampus ng Okinawa International University. Nagkataong walang pasok ang mga estudyante kaya walang namatay o nasaktan. Dahil dito, lalo pang lumakas ang pagtutol at paglaban ng mga mamamayan.

Para mapahupa ang mga protesta, nagkaroon ng kasunduan ang US at Japan noong 2006 na ilipat ang Futenma Base sa ibang lugar sa Okinawa. Mula noon, namuo na ang galit ng mamamayan sa naturang kasunduan at iginigiit na nila ang pagpapataksik ng base militar sa labas ng Japan.

Malawak na kilos-protesta sa US laban sa batas kontra imigrante

PUMUTOK ang sunud-sunod na kilos-protesta ng mga mamamayang Amerikano sa 70 syudad ng US noong Mayo 1 para tutulan at labanan ang rasistang Immigration Law ng estado ng Arizona. Ang protestang ito ay nagresulta sa paglakas ng panawagan na baguhin ang Federal Immigration Law (batas sa imigrasyon) ng US.

Ang tinututulang Immigration Law ng estado ng Arizona na ipinasa noong Abril ay nagbibigay-awtoridad sa mga pulis na sitahin at arestuhin ang sinumang pinaghihinalaang iligal na imigrante o dayuhan. Isinasaad din sa nasabing batas na ang mga imigrante ay dapat palagi magdala ng kanilang papeles. Papatawan ng mabibigat na multa ang sinumang mag-eempleyo o magpapalusot ng mga iligal na imigrante.

Ang pinakamalaking protesta ay naganap sa Los Angeles, California, kung saan 100,000 ang naglunsad ng martsa-rali sa sentro ng syudad. Maraming estado ang nanawagang iboykot ang Arizona, laluna ang California kung saan ang malalaking syudad tulad ng Los Angeles at San Francisco ay nagpanukala na tuluyan nang putulin ang ugnay sa naturang estado.

Sa Washington, mahigit 30 raliyista, kasama si Congressman Luis Guitierrez ng Illinois ang inaresto dahil sa pagharang sa bangketa sa bandang harapan ng mga tarangkahan ng White House. Mahigpit niyang tinuligsa si US President Barack Obama sa kabiguan niyang tuparin ang kanyang pangako noong 2008 na igiit ang reporma sa imigrasyon kasama na ang paggagawad ng amnestiya sa tinatayang 12 milyong iligal na imigrante sa US.

Dahil sa malawakang pagtutol,

mismong si Obama ay nagpahayag na ang nasabing batas ay mali at hindi napag-isipang mabuti. Inutos niya sa Justice Department na pag-aralan kung ito'y lumalabag sa konstitusyon ng US. Matatandaan na isang milyong mamamayan sa

California ang naglunsad ng dam-buhalang rali noong Marso 2006 laban sa House Immigration Bill 4447 na nagsasaad na sasampahan ng kasong kriminal ang sinumang mapatutunayang iligal na imigrante.

Greece, niyayanig ng welga


NIYANIG ang bansang Greece ng dalawang araw na pangkalahatang welga nitong Mayo 3 at 4 bunsod ng panukalang paghihigpit sa gastos ng gubyerno kapalit ng 110 bilyong *euro* (katumbas ng \$145 bilyon) na ayuda ng European Union at International Monetary Fund (IMF).

Naging masyadong desperado na ang gubyerno ng Greece dahil sa sobrang laki na ng depisit nito. Hindi na rin nito mabayaran ang patung-patong na utang mula pa noong nakaraang mga rehimen na umaabot na sa \$300 bilyon. Nangangamba ang maraming bansa na ang pagbagsak ng ekonomya ng Greece ay magbubunsod ng panibagong paglala ng pampinansyang krisis di lamang doon kundi sa buong European Union at sa pandaigdigang sistemang kapitalista. Kaya sinaklolohan ito ng iba pang myembro ng European Union at ng IMF sa pamamagitan ng pagbibigay ng panibagong pautang na pinakamalaki na sa kasaysayan ng Europe.

Dahil dito, nagsimulang kumilos ang mga manggagawa sa pampublikong sektor noong Mayo 3. Pinasok ng mga myembro ng Communist Organization of Greece (Kommunistiki Organosi Elladas o KOE) ang lumang Acropolis sa Athens (kabisera ng Greece) para maglagay ng malaking istrimer na nananawagan ng "People of Europe Rise Up" o "Mamamayan ng Europe Magbangon Ka." Ang Acropolis, na matatagpuan sa isang matayog na burol ay kinalalagyan ng mga lumang templo at iba pang gusali at siyang pinakaprominenteng lugar sa buong Athens na dinadagsa rin ng maraming turista.

Inaasahang magpapatuloy ang mga kilos-protesta at lalahukan ito maging ng mga elemento ng hukbo ng gubyerno na tutol sa dikta ng EU at IMF oras na isumite sa parlamento ang panukalang paghihigpit para pagtibayin ito.

Ilan sa mga hakbanging paghihigpit ng gubyerno ni Prime Minister George Papandreou ang pagtanggap ng bonus para sa mga manggagawa sa pampublikong sektor; pagpako sa mga sahod at pagbawas sa pensyon sa pampublikong sektor sa loob ng tatlong taon; 23% pagtaas ng VAT mula 21%; 10% pagtaas ng buwis sa langis, sigarilyo, tabako at alak; pagtatakda ng hangganan sa ibinibigay na *holiday bonus*; at pagbubuwis sa mga tumatanggap ng matataas na sahod.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 9

May 7, 2010

www.philippinerevolution.net

Editorial

Magkaisa at wakasan ang rehimeng US-Arroyo


Ilang araw na lamang bago ang reaksiyunaryong eleksyon sa Mayo 10. Umaasa ang maraming Pilipino na kasabay nito ay matatapos na ang termino ng kinamumuhiang rehimeng US-Arroyo.

Sawang-sawa na ang mamamayan sa paghaharing US-Arroyo. Sa mahigit siyam na taon nito sa poder, tuluy-tuloy na dumausdos ang kabuhayan, sumirit ang disempleyo at lalong lumaganap ang kahirapan, kagutuman at kaapihan.

Naging sunud-sunuran ang papet na rehimen sa mga dikta ng among imperyalistang US. Binigyang-daan ang permanenteng presensya ng mga tropang Amerikano sa bansa at ang panghihimasok ng US sa lahat ng mahahalagang usapin kabilang na ang eleksyon, para mapanatili ang neokolonyal na paghahari nito sa bansa.

Bunsod ng todo-largang pagsasakatuparan ng imperyalistang patakarang neoliberal, nawasak ang mga produktibong pwersa, lumala ang problema sa lupa at ang pagkaatrasado at pagkalugmok sa krisis ng kabuhayan ng mamamayan. Walang hanggan ang pandarambong at pangungurakot. Labis ang kasalanan ng serbisyo sa kalusugan, edukasyon, pabahay at iba pang batayang pangangailangan ng mamamayan. Lalong naging bangkarote at lubog sa utang ang reaksiyunaryong gubyrno.

Hinigitan ng siyam na taong Oplan Bantay Laya ang kalupitan at terorismo ng lahat ng mga nagdaang kontra-mamamayang kampanya ng panunupil ng papet na reaksiyunaryong estado. Nilagpasan nito ang 14 na taon ng pasistang diktadurang US-Marcos sa dami ng mga kaso ng ekstrahudisyal na pagpatay at pagdukot ng mga aktibista, paghahasik ng teror sa



Mga tampok sa isyung ito...

**"Oplan RAFAEL,"
gumugulong na**

PAHINA 3

**51 armas, nasamsam
ng BHB sa Negros at
Mindanao**

PAHINA 6

**Imahe ni Ka Bel,
pinasinayaan sa
Maynila**

PAHINA 8

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com